



INGURUMEN, LURRALDE PLANGINTZA ETA
ETXEBIZITZA SAILA
Ingurumen Sailburuordetza
Ingurumen Administrazioaren Zuzendaritza

DEPARTAMENTO DE MEDIO AMBIENTE,
PLANIFICACION TERRITORIAL Y VIVIENDA
Viceconsejería de Medio Ambiente
Dirección de Administración Ambiental

EBAZPENA, 2019ko abenduaren 11koa, Ingurumen Administrazioaren zuzendariarena, zeinaren bidez formulatzen baita Sestaoko eta Trapagarango udal-mugarteetako Ibarzaharra 06 industria- eta zerbitzu-eremuko Hiri Antolamenduko Plan Bereziaren Aldaketaren ingurumen-ebaluazio estrategikoaren irismen-dokumentua.

AURREKARIAK

2019ko irailaren 17an, Sestaoko Udalak eskaera egin zuen Ibarzaharra 06 industria- eta zerbitzu-eremuaren Hiri Antolamenduko Plan Bereziaren aldaketaren ingurumen-ebaluazio estrategikoaren irismen-dokumentua emateko, bat etorrita Euskal Autonomia Erkidegoko ingurumena Babesteko otsailaren 27ko 3/1998 Lege Orokorrean eta Ingurumen Ebaluazioari buruzko abenduaren 9ko 21/2013 Legean xedatutakoarekin.

Eskabideari dokumentazio hau erantsi zitzaion: planaren zirriborroa, inpaktu akustikoaren ikerketa, sektoreko legerian eskatutako dokumentazioa, hasierako dokumentu estrategikoa eta planen eta programen ingurumenaren gaineko eraginaren ebaluazio estrategikoa egiteko prozedura arautzeko urriaren 16ko 211/2012 Dekretuaren V. eranskineko formularioa.

Ukitutako administrazio publikoei eta pertsona interesdunei kontsultatzeko tramitea egin zen, halaxe zehazten baita abenduaren 9ko 21/2013 Legearen 19. artikuluan eta planen eta programen ingurumen-ebaluazio estrategikoaren prozedura arautzen duen urriaren 16ko 211/2012 Dekretuaren 9. artikuluan.

Jasotako txostenak aztertuta, egiaztatu da ingurumen-organoak bazituela behar beste judizio-elementu ingurumen-azterketa estrategikoaren irismen-dokumentua egiteko, bat etorrita hala abenduaren 9ko 21/2013 Legearen 19. artikuluaekin eta urriaren 16ko 211/2012 Dekretuaren 10. artikuluaekin.

ZUZENBIDEKO OINARRIAK

Ingurumen Ebaluazioari buruzko abenduaren 9ko 21/2013 Legearen 1. artikuluan xedatutakoaren arabera, lege horren xedea da ingurumenean ondorio adierazgarriak izan ditzaketen planen ingurumen-ebaluazioa arautuko duten oinarriak ezartzea, ingurumenaren babes-maila handia bermatuz, garapen jasagarria sustatze aldera.

Halaber, Euskal Autonomia Erkidegoko ingurumena babesteko 1998ko otsailaren 27ko 3/1998 Lege Orokorraren 42. artikuluaaren arabera, ingurumen-inpaktuaren ebaluazioek behar bezala bermatuko dute, besteak beste, helburu hau betetzen dela: hautabide egokienak hautatu ahal izateko, plangintza-prozesuaren lehen faseetan egingo dela ingurumenaren gaineko eraginei buruzko analisia, betiere kontuan izanik jardueren ondoriozko eragin metatzaile eta sinergikoak.

Abenduaren 9ko 21/2013 Legearen 6.1. a) artikuluan ezarritakoaren arabera, ingurumen-ebaluazio estrategiko arrunta egingo zaie planei eta programei, baita haien aldaketei ere, baldin eta administrazio publiko batek onartzen baditu eta legezko edo arauzko xedapen batek aginduta egiten eta onartzen badira, ingurumen-inpaktua ebaluatu behar zaien proiektuak etorkizunean baimentzeko esparrua zehazten dutenean.

Otsailaren 27ko 3/1998 Legearen 46.1 artikuluan xedatutakoaren arabera, ebaluazio bateratua egin behar da (ingurumen-ebaluazio estrategikoa) arauaren I. eranskineko A) letran jasotako planei dagokienez, eta plan horien artean sartzen da Ibarzaharra 06. industria- eta zerbitzu-eremuaren Hiri Antolamenduko Plan Bereziaren aldaketa.

Abenduaren 9ko 21/2013 Legeak xedatzen duenez, plan baten ingurumen-ebaluazio arrunta hasteko, beharrezkoa da ingurumen-organoak ingurumen-azterketa estrategikoaren irismena zehaztea, ukitutako administrazio publikoei eta interesdunei kontsulta egin ostean. Arau horrek 18.1. artikuluan xedatzen ditu hasiera-eskabideari erantsi beharreko dokumentuak, eta, abenduaren 9ko 21/2013 Legeari aurka egiten ez zaionean, urriaren 16ko 211/2012 Dekretuaren 8. artikulua zabaldu eta osatu egiten du hasierako dokumentu horri erantsi beharrekoaren edukia.

Amaitzeko, ingurumen-azterketa estrategikoaren irismena zehazte aldera, aintzat hartu dira 2013ko abenduaren 9ko 21/2013 Legeak IV. eranskinean jasotako eskakizunak, ingurumen-azterketa estrategikoaren edukari buruzkoak, bai eta 2012ko urriaren 16ko 211/2012 Dekretuak I. eta II. eranskinetan jasotakoak ere, erreferentziako dokumentuaren edukari eta ingurumen-jasangarritasunari buruzko txostenaren edukari buruzkoak, hurrenez hurren.

Orain arte azaldutakoari jarraikiz, espedienteko txostena aztertu da, eta xedapen hauek guztiak ikusi dira: 3/1998 Lege Orokorra, otsailaren 27koa, Euskal Autonomia Erkidegoko ingurumena Babestekoa; 21/2013 Legea, abenduaren 9koa, Ingurumen Ebaluazioari buruzkoa; 211/2012 Dekretua, urriaren 16koa, Planen eta programen ingurumen-ebaluazio estrategikoaren prozedura arautzekoa; 77/2017 Dekretua, apirilaren 11koa, Ingurumen, Lurralde Plangintza eta Etxebizitza Sailaren egitura organiko eta funtzionala ezartzekoa; 39/2015 Legea, urriaren 1ekoa, Administrazio Publikoen Administrazio Prozedura Erkidearena; 40/2015 Legea, urriaren 1ekoa, Sektore Publikoaren Araubide Juridikoarena, eta aplikatzekoa den gainerako araudia. Horiek horrela, hau

EBAZTEN DUT

Lehenengoa. Ibarzaharra 06. industria- eta zerbitzu-eremuaren Hiri Antolamenduko Plan Bereziaren aldaketaren ingurumen-ebaluazio estrategikoaren irismen-dokumentua formulatzea, ingurumen-ondorioetarako soilik, eta honako baldintza hauen arabera:

1.- Aldaketaren xedea eta ebaluazio-prozesuaren irismena

Ibarzaharra 06. industria- eta zerbitzu-eremuaren Plan Berezia 2012an onartu zen, eta urte horretan bertan onartu zen Sestaoko eta Trapagarango hirigintzako udal-plangintza bateragarri egiteko planean Ibarzaharra eremurako eta inguruetarako xedatu egiturazko zehaztapenak garatzen ditu. Eremuak, batik bat, ekoizpen-erabilera izango du, industria-kategoriako 3. azpikategoriakoa.

Plan Bereziaren aldaketaren xedea da (aurrerantzean, plana) lurzatiak berrantolatzea, baita horietarako sarbideak eta barneko bideak ere. Hala, aipatu udal-mugarteen arteko mugan kokatutako 06. eremuaren eta Ibarzaharrako gainerako eremuen (04., 05. eta 07.) arteko konexioak egituratuta geratuko dira.

Planak eutsi egin die bai eremuaren eta iparraldean dagoen Ballonti korridorearen arteko konexio nagusiei, bai BI-644 errepidearen artekoiei. Hala, bide-garraioko foru-sistema orokorra bete da, bai, halaber, Ballonti ibaiaren inguruen sistema hidrauliko orokorra ere (ekialdean). Gainerakoa, planak aldaketa hauek proposatzen ditu indarrean dagoen plan berezian:

Aurreikusitako bigarren mailako bideetako batzuk kenduko dira, ekoizpen-erabilera lurzatiak berrantolatzeko. Hala, hiru eremu handi eratu dira bi bide-ardatz nagusien inguruan (iparralde-hegoaldea eta mendebalde-ekialdea). Hiru eremuok indarreko planean jasotakoak baino handiagoak izango dira, eta industria arineko ekoizpen-erabilera pribatuko 8 lurzati bantuko dira (SZ-II: 01etik 08ra). Guztira, 101.096,82 m²-koa izango da azalera; eraikigarritasuna, 83.815,00 m²-koa (s) sestra gainean, eta 41.908,00 m²-koa sestra pean.

Eklaldea-mendebalde bide-ardatzaren zati bat sartu da planean, 04. Ibarzaharra eremuaren plan berezian aurreikusia, eremu hori, BI-3743 errepidea eta 06. Ibarzaharra eremua lotzen dituen, eta BI-3746 errepidearen eta 04. Ibarzaharra eremuaren artekoak aldatzen dira. Halaber, planak kendu asmo du Ibarzaharra 06. eremuaren plan berezian aurreikusita zegoen biribilgunea, zirkulazio txikiagoa espero delako, eta lurzati pribatuen barnealdean aparkatzeko leku gehiago sortuko ditu.



Bidegorriak proposatzen dira eremuan, eremu mugakideak eta Sestaoko herrigunea lotzeko, foru-bidegorriaren bitartez.

- Planak apenas aldatzen ditu bateragarritasun-planeko kotak (+5 m) eraikinen sestran eta beheko solairuetan, inguruko azterketa hidraulikoari jarraikiz. Irizpide horren arabera, planak +5,80 metroan ipintzen du kotarik beherena, zubiaren azpiko bidegurutzean, iparraldetik hegoalderako noranzkoan gora, +6,72 metroko kotara iritsi arte.
- Tokiko bide-sistemaren azalera hasieran aurreikusitako baino % 40 txikiagoa izango da. Bide-babeseko toki-sistemak % 77 murriztuko dira.
- Espazio libre antolatuen toki-sistemen azalera ere % 10,5 murriztuko da proposatzen den aldaketarekin. Espazio horiek guztiak eremuaren iparraldean daude, Ballonti ibaiaren ertz bitan, eta lurzati pribatuen mugetan.

2. Ingurumen-helburu estrategikoak, printzipioak eta jasangarritasun-irizpide aplikagarriak.

Plana egiteko funtsezko oinarritzat hartuko dira IV. Ingurumen Esparru Programa 2020ren helburu estrategikoak eta jarduera-ildoak. Zehazki, kontuan hartu beharko da nola Planak barne hartzen duen 1.3 jarduketa-ildoaren 9. jarduketa, zeinak honako hau ezartzen baitu: «*Biztanleria-dentsitate handiagoei lehenetsuna ematen dien, erabilera-konbinazioa sustatzen duen eta lurzoru-kontsumoa optimizatzen duen lurralde-antolamendu adimendun bat ezartzen dela bultzatzea, haren berrerabilpena eta birsortzea lehenetsiz*».

Horrez gain, jaso beharrekoa izango dira, halaber, Euskal Autonomia Erkidegoko ingurumena babesteko Lege Orokorrean bildutako irizpideak (otsailaren 27ko 3/1998 Legea) eta Euskal Autonomia Erkidegoko Natura Kontserbatzeko Legearen testu bategina onartzen duen apirilaren 15eko 1/2014 Legegintzako Dekretuan bildutakoak.

Era berean, kontuan hartuko dira planari aplikagarri zaizkion lurralde-antolamenduko planetan eta plan sektorialetan ingurumena babesteko finkatutako irizpideak, helburuak eta zehaztapenak.

Urriaren 16ko 211/2012 Dekretuaren 2. artikulua aplikatuz, honako hauek dira Planaren ingurumen-ebaluazioa gidatu beharko duten garapen jasangarriaren printzipioak:

- Lurzorua zentzuz erabiltzea eta lehendik ere artifizialdurik dauden lurzoruen erabilera intentsiboa lehenetsia, balio agrologiko handiko lurzorua eta lurzoru naturala urbanizaziotik babestuz.
- Hiri-segregazioa, hiri-barreiadura eta mugikortasun behartua saihestea irisgarritasuna sustatzeko asmoz, lurzoruaren erabilerekin plangintza integratuaren, mugikortasunaren, eta hiri-egitura dentsu, trinko eta konplexuen bidez.
- Lurzoruaren zigilatzea murriztea, lurzorua iraunkortasun handiagoz erabiliz eta ahal beste eginkizuni euts diezaion sustatuz.
- Habitata eta espezieak, natura-ingurumena eta konektagarritasun ekologikoa zaintzea eta hobetzea.
- Natura-arriskuak gutxitzea.
- Natura-baliabideen kontsumo jasangarria sustatzea: ura, energia, lurzorua eta materialak.
- Aire garbia bermatzea, baita zarata eta argi-kutsadura handien mende bizi diren biztanleen kopurua murriztea ere.
- -) Ur-masen egoera ekologiko ona lortzea, bai eta baliabidearen erabilera jasangarria ere.
- Paisaia- eta kultura-ondarea kontserbatu eta hobetzea.
- Energia-aurrezpena eta energia berriztagarrien efizientzia eta erabilera sustatzea, baita kogenerazioa ere.
- Klima-aldaketaren aurreko zaugarritasuna gutxitzen laguntzea, kaltea arintzeko neurriak eta egokitze neurriak integratuz.

3. Esparru geografikoa eta ingurumen-arlo garrantzitsuak

Planaren xede den eremua Galindo ibaiaren ibarrean dago eta 182.117,23 bat m² hartzen ditu Sestaoko eta Trapagarango udal-mugarten arteko mugaren bi aldeetan. Oso eremu antropizatua da, inguruan egin diren jarduketak industrialek eraldatua, eta ingurumen-interes berezirik gabea. Lehenagoko urbanizazioaren eta eraikinen aztarnak daude (garai batean Babcock Wilcox enpresa egondako lurrekin bat dator eremua zati batean).

Planaren eraginpean zuzenean dagoen esparrua ez da Natura 2000 sareko naturagune babestua, ezta inbentarioan sartutako gune babestua edo natura interesekoa ere. Ez dator bat EAEko korridore ekologikoen sareko inolako egiturazko elementurekin, ez dago paisaia-balio inbentariatu edo katalogaturik, ezta kultura-ondareko elementurik ere, planak eragin ditzakeenik.

Plana ingurune ia erabat industrialean gauzatzekoa da, eta eremu horren ingurumen-kalitatea oso txikia da. Ballonti ibaia aipatu behar da, eremuaren iparraldean doana. Ekialdean, Galindo ibaia dago, baina ez du izango planaren eragin zuzenik.

Bisoi europarra (*Mustela lutreola*) kudeatzeko planak, Bizkaiko Foru Aldundiak uztailaren 19ko 118/2006 foru-dekretuaren bidez onartu zenak, sektorea zeharkatzen duen Ballonti ibaiaren zatia «hobetu beharreko» gisa sailkatzen du. Espezie Mehatxatuen EAEko Katalogoan agertzen da, «galzorian» kategorian.

Bestalde, Galindoren arroa arrain hiruarantzaren (*Gasterosteus aculeatus*) interes bereziko gunea da. Espezie mehatxatuen EAEko katalogoan sartuta dago espezie hori, egoera kalteberan. Horrenbestez, Bizkaian arrain hiruarantza kudeatzeko plana aplikatu behar da (Bizkaiko Foru Aldundiak 186/2008 Foru Dekretu bidez onartua 2008ko abenduaren 9an).

Ballonti eta Galindo ibaien Uholde Arrisku Handiko Eremuan dago area (UAHE - ES017-BIZ-IBA-02), lehentasunezko fluxu-eremuaren barruan eta 10 eta 100 urteko errepikatze-denborako uraldiak ukituta.

Ia eremu osoa Bizkaiko foru-errepideen zortasun-eremu akustikoaren eraginpean dago (4523/2013 Foru Agindua).

4. Jarduketak egiteko eremu desegokiak

Planaren xede den eremuan, ez da hauteman jarduketak egiteko eremu desegokirik, baldin eta ingurumen-araudi aplikagarria betetzen bada, batik bat, arlo hauetan: lurzorua kutsatzea ekiditea eta kutsatutakoa garbitzea, plangintza hidrologikoa, uholde-arriskuaren prebentzioa eta kutsadura akustikoa.

5. Aurretiazko kontsultetako erantzunen ingurumen-azterketa laburra

Jarraian, eraginpeko administrazio publikoei eta pertsona interesdunei egindako kontsulta-izapidean jaso diren txostenetako ingurumen-arloko eduki garrantzitsuenak laburbildu dira:

Natura-ondareari dagokionez, arrain hiruarantzaren presentziaren berri eman da (kudeaketa-plan onartua du Bizkaian) Galindoren arroan, Ballonti ibaiaren ahotik Santurtziko Tocedo auzorako sarbide-zubira doan tartean. Halaber, jarduketa-eremua hobetu beharreko tartea da, bisoi europarraren kudeaketa-planaren arabera. Horrenbestez, ezingo da azpiegitarik gauzatu edo eraikigarritasunik esleitu Ballonti ibaiaren ertzetan, 5 metroko zerranda batean. Sortu daitezkeen espazio libreak gune horietan kokatzea gomendatzen da. Ebaluazio estrategikoak xehe-xehe aztertu behar ditu espezie mehatxatu bion gaineko balizko kalteak, babes- eta zuzenketa-neurri egokiak ezarrita. Bestalde, lur-mugimenduak egin behar diren eraikuntza-proiektuek prebentzio- eta zainketa-plana izan beharko dute, espezie exotiko inbaditzaileak ez errotzeko.

Lurzorua kutsa dezaketen jardueren kokaguneen EAEko inbentarioan sartutako lurzati-taluk batzuk, osorik edo zati batean, eremuaren barnean daude. Horiek erabiltzaileentzako edo ingurumenarentzako arriskutsuak izan daitezke. Dokumentu estrategikoak 48084-00004 eta 48080-00007 aipatzen ditu.

Alabaina, aipatu inbentarioak hauek ere zehazten ditu: 48084-00085, 48084-00087, 48084-00094 eta 48084-00097. Kasu guztietan, lurzoruaren kalitate-adierazpenaren espedienteak izapidetu dira, eta horietako batzuk jada lurzoruaren kalitate-adierazpenarekin burutu dira. Gainerakoak, izapidetzen ari dira. Lurzoru horiei dagokienez, sustatzaileak 4/2015 Legearen, lurzorua kutsatzea prebenitzeko eta kutsatutakoa garbitzekoaren, 23. artikuluan eta hurrengoetan ezarri betekizunak bete behar ditu.

Planaren xede den eremuan, ez da hauteman kultura-ondarearentzako kalterik.

6. Ingurumen-azterlan estrategikoan kontuan hartu beharreko funtsezko alderdien definizioa eta irismena.

Planeko zehaztapenek 2012an onartu zen Ibarzaharra 06. industria- eta zerbitzu-eremuaren Plan Berezian xedatutako antolamendu xehatua aldatzen dute. Hortaz, kasu horretan egingo den ingurumen-ebaluazioa aurreikusitako aldaketan ondorio espezifikoetan oinarrituko da. Alegia, proposatutako aldaketatik eratorritako ondorioak besterik ez dira kontuan hartu behar, eta ez plana aldatu izan ez balitz ere gertatuko liritekeen ondorioak.

Ingurumen-azterketa estrategikoak abenduaren 9ko 21/2013 Legearen IV. eranskinean ezarritako gutxieneko edukia izango du, eta hori urriaren 16ko 211/2012 Dekretuaren II. eranskinean jasotakoarekin osatu behar da. Lehen adierazitakoari jarraiki, azterketak honako eskema metodologiko honi jarraitu behar dio:

1. Proposatutako planaren deskribapena
 - 1.1. Plangintzaren esparrua eta helburuak
 - 1.2. Planaren irismena, edukia eta garapena
 - 1.3. Planifikatzeko aukerak
2. Ingurumenaren ezaugarriak zehaztea
 - 2.1. Ingurumen-egoeraren deskribapena
 - 2.2. Laburpena: ingurumen-alderdi esanguratsuak
3. Ingurumen-efektuak
4. Prebentzio-, zuzenketa- eta konpentsazio-neurriak.
5. Ingurumena zaintzeko programa
6. Ingurumen-laburpena
7. Laburpen ez-teknikoa

Ebaluatzen den dokumentuaren ezaugarriak direla eta, uste da ingurumen-azterketa estrategikoak – aurrerantzean, azterketa– behean azaltzen diren alderdietan sakondu behar duela, adierazten den zabaltasun- eta zehaztasun-mailarekin:

6.1. Planaren deskribapena

6.1.1. Plangintzaren esparrua eta helburuak

a. Azterketan Plan Bereziaren aldaketarekin lortu nahi diren helburu nagusien laburpen txiki bat jasoko da. Azterlanak era espezifikoa justifikatu behar du nola hartu diren kontuan Planaren elaborazioa egitean Ebazpen honetako 2. apartatuan ingurumena babesteko jaso diren helburuak eta printzipio eta irizpide jasagarriak.

b. Planaren gainera dauden plan edo programak identifikatuko dira, haien helburuak eta determinazioak planaren bidez garatzen baitira. Planaren xedarekin edo esparruarekin zerikusia duten plan edo programa horien determinazioak eta aurreikuspenak azaletik deskribatuko dira, baita plan edo programa horretan aplikatzekoak diren ingurumena babesteko irizpide, helburu eta determinazioak ere. Hierarkian Planaren gainera dauden plan edo programen onspen-egintzaren aipamena eta data aurkeztuko dira, eta plan edo programa horiek ingurumen-ebaluazio estrategikoaren mende jarri diren ala ez zehaztuko da. Halaber, Ibarzaharra 04. eremu mugakidearen plan berezia kontuan hartu behar da (izapidetzen ari da).

c. Planaren bitartez indarreko antolamenduaren barruan aldatuko diren alderdi zehatzak eta zehaztapenak deskribatuko dira.

d. Hala badagokio, bateragarritasun-planaren eta hori garatzeko beste tresna batzuen ingurumen-adierazpen estrategikoan ezarritako irizpide eta zehaztapenak bilduko dira, baldin eta ebaluaturiko Planaren esparru edo xedean aplikatzekoak badira. Ingurumen-adierazpen estrategikoen erreferentzia aurkeztuko da, eta zehaztu egingo da zer Aldizkari Ofizialetan argitaratu diren, kontsultatzeko gunerako esteka ere txertatuta.

e. Arauetan eta hierarkia-loturarik ez duten bestelako planetan edo programetan finkatutako ingurumen-babeseko irizpideak, helburuak eta zehaztapenak adieraziko dira, aplikatu behar badira. Zehazki, eta beste batzuen artean, honako plan hauek hartuko dira kontuan:

- EAeko Ibaiak eta Errekak Antolatzeko Lurralde Plan Sektoriala.
- Kantauriko Ekialdeko Demarkazio Hidrografikoko Espainiako zatiko Plan Hidrologikoa (2015-2021).
- Kantauri Ekialdeko Demarkazio Hidrografikoaren Uholde Arriskua Kudeatzeko Plana (2015-2021).
- Bizkaian bisoi europarra kudeatzeko plana, Bizkaiko Foru Aldundiaren ekainaren 19ko 118/2006 Foru Dekretu bidez onartua.
- Bizkaian arrain hiruarantza kudeatzeko plana, Bizkaiko Foru Aldundiaren abenduaren 9ko 186/2008 Foru Dekretu bidez onartua.
- Ekainaren 25eko 4/2015 legea, lurzorua kutsadura prebenitzeko eta zuzentzekoa, 23. eta 31.4 artikulua.
- Urriaren 16ko 213/2012 Dekretuaren (EAeko hots-kutsadurari buruzkoaren) 36. artikulua eta hurrengoak.

6.1.2. Planaren irismena, edukia eta garapena

a. Aldaketaren irismena behar bezala zehaztuta utzi behar da, aldaketa egin aurreko aurreikuspenak – planaren ingurumen-ebaluazioa egitean indarrean zeudenak – eta aurreikuspen berriak alderatuz.

b. Planean proposatzen diren aldaketak gauzatzeko egingo diren proiektuen eta jarduketan izaera xedatuko da, batik bat, lurzoru kutsatuei, urbanizazio-proiektuari, ekoizpen- edo merkataritza-jardueren instalazio-proiektuei eta Ballonti ibaian egin beharreko jarduketari lotuetan. Epigrafe honetan biltzen den informazioa eskala egokian islatuko da kartografian, eta lurraldearen erabilera islatuko du, baita ingurumen-ondorio nabarmenak ekar ditzaketen Planaren aurreikuspen eta jarduketak ere.

c. Ingurumenean eragina izan dezaketen planeko ekintzak deskribatu eta kokatuko dira, eta garrantzi handikoenetik txikikoenera hierarkizatuko dira, haien kokapen zehatza, izaera, magnitudea eta baliabide naturalen kontsumoa kontuan hartuta. Horrela deskribatutako planeko ekintza bakoitzari kode bat esleituko zaio. Kode hori azterketaren hurrengo ataletan erabiliko da, eta atal horietan haren aipamena egin beharko da.

d. Plana onartu ondoren, haren garapena zehaztu eta plangintzaren geroagoko faseak aipatuko dira, baita planaren zehaztapenak ezartzeko tresnak ere. Era berean, garapen-tresna eta / edo -proiektu horiek ingurumen-ebaluazioaren mende egon daitezkeela aurreikusiko da.

e. Nolanahi ere, Plana garatzeko aldi baterako xedapena erantsiko da, eta, bidezkoa bada, aurreko atalean azaldutako ekintzetarako zehaztuko da.

f. Epigrafe honetan biltzen den informazioa eskala egokian islatuko da kartografian, eta lurraldearen erabilera islatuko du, baita ingurumen-ondorio nabarmenak ekar ditzaketen Planaren aurreikuspen eta jarduketak ere. Beharrezkoa bada, eremuaren mugak ageriko diren informazio kartografikoa atxiki beharko da, eta jarduketan kokapena, pdf eta shape formatuetan.

6.1.3. Planifikatzeko aukerak

a. Plana emateko prozesuan kontuan hartu diren aukera guztiak azaletik deskribatuko dira. Alternatiba horiek bideragarriak izan behar dute teknikoki eta ingurumenaren aldetik, eta alderdi hauei buruzkoak izan daitezke: kokalekua, garapen teknikoa, aldi baterako garapena, kudeaketa, antolamendua, baliabide naturalen erabilera edo beste edozein alderdi.

b. Alternatiba horien irismena deskribatuko da, eta aukera bakoitzetik eratorritako proiektuen eta Planeko ekintzen arteko aldeak zehaztuko dira, 1.2.b apartatuan deskribatutako proiektuekin eta Azterlaneko 1.2.c apartatuan deskribatutako ekintzekin alderatuta.

e. Kontuan hartutako plangintza-aukerak baztertzeko eta proposatutako aukera azkenik hautatzeko arrazoien laburpena ere bilduko da.

f. Aztertutako alternatibak kartografikoki jasoko dira.

6.2. Ingurumenaren ezaugarriak zehaztea

Azterketak Planaren aldaketak eraginpean hartzen dituen esparruetako ingurumen-egoeraren alderdi garrantzitsuak deskribatu beharko ditu. Karakterizazio hori elementu abiotikoei eta biotikoei buruzkoa izango da, bai elementu mota bakoitzaren ikuspegi sektorialetik, bai haien interakzioen ikuspuntutik egina, ingurumenaren egungo egoeraren ikuspegi integratua emateko.

Planaren eraginpeko esparrutzat, antolamendu-esparru osoaz gain, haren ingururik hurbilena hartu behar da, Planaren ekintzek ingurumen-ondorio garrantzitsuak izan ditzaketen eremuetara mugatuta.

Ingurunearen kalitateari buruzko alderdiei buruzko informazioa azterketetan edo bestelako erreferentzia-dokumentuetan oinarrituta dagoenean, emandako datuen iturria identifikatuko da, eta izenburua, urtea, egilea eta, hala badagokio, lana bere osotasunean kontsulta daitekeen gunerako esteka adieraziko dira.

Azterketak eskala egokiko planoak izango ditu, ingurunearen aldagaiak islatuta.

6.2.1. Ingurumen-egoeraren deskribapena

Honako hauek izango dira, gutxienez, aintzat hartuko diren ingurumen-alderdiak:

a. Ingurune hisikoa. Zenbait faktore hartuko dira kontuan, hala nola arroka ama eta zorupea, haien iragazkortasuna, masak eta ur puntuak, faktore klimatikoak eta lurzoru mota.

b. Natura-ondarea. Natura- eta ekologia-intereseko elementuak jakinaraziko dira, baleude; esaterako, fauna-espezie mehatxatuen banaketa-eremuak (arrain hiruarantza eta bisoi europarra). Egungo elementuen kontserbazio-egoerari buruzko datuak emango dira, baita interes maila, zaurgarritasuna, egungo presio eta mehatxuak ere, plana gauzatzean areagotu daitezkeenak.

c. Paisaia. Pertzepzio-intereseko elementuen presentzia aztertuko da.

d. Ingurumen-arriskuak eta -arazoak. Uholdeak izateko arriskuari, lurzoruko kutsaduratik eratorritako arriskuari, lurpeko uren kalteberatasunari, arrisku geoteknikoei, klima-aldaketak eragindako arriskuei edo aipatu beharreko beste edozein ingurumen-arriskuri buruz bildu ahal izan diren datu guztiak aurkeztuko dira.

e. Orobat, airearen, uraren edo lurzoruaren kalitateari dagokionez hautemandako ingurumen-arazoak deskribatuko dira, egoera akustikoa barne. Iturri kutsatzaile izan daitezkeenak identifikatuko dira.

6.2.2. Laburpena: ingurumen-alderdi esanguratsuak

Aurreko atalean azaldutako deskribapen eta datuetan oinarrituta, ingurumenaren egungo egoera aztertuko da Planaren eraginpeko esparruan, eta labur-labur jasoko dira planak dakartzan aldaketetatik eratorritako ingurumen-alorreko elementu, prozesu, arazo eta arrisku esanguratsuenak, ingurumen-

ebaluaziorako prozesuan garrantzitsuak izango direnak. Ingurumenaren ikuspegitik interesgarriak diren esparru, elementu edo egoeretan jarri beharko da arreta, baita eragina jasan dezaketen alderdietan ere, planean jasota dauden aldaketen ondorioz sortuko diren proiektuen eta ekintzen kokapena eta ezaugarriak kontuan hartuta.

Ingurumen-azterketa estrategikoak ingurumenaren aldetik arazotsuak izan daitezkeen eremuak hauteman beharko ditu, proposamenen garapena horiekin bateragarri egiteko; horretarako, kontuan hartu beharko du Ebazpen honen 3. apartatuan adierazi diren eta ingurumenaren aldetik garrantzitsuak diren eremu edo elementuak daudela. Era berean, eremuaren ingurumen-diagnostiko egokia egin beharko da, haren harrera-gaitasuna, arrisku guneak eta eremu hauskor edo kalteberak ebaluatzeko.

6.3. Proposatutako planaren ingurumen-efektuak

a. Atal honetan, Planean bilduriko ekintzek azterketaren 2. apartatuan deskribatutako ingurumen-kalitateko elementuetan izan ditzaketen efektuak identifikatu eta baloratu beharko dira, efektu horien ezaugarriak deskribatuta. Planaren ondorioak identifikatu eta karakterizatzeko, lanean aurreikusitako ekintzen eta eragin ditzaketen ingurumen-elementuen ezaugarri espezifikoaren arteko interakzioak aztertuko dira, baita sor daitezkeen edo larriagotu eta areagotu daitezkeen ingurumen-arazoak eta -arriskuak ere.

Ezaugarrien deskribapenean zehatz eta argi adierazi beharko da zer motatako efektua den, honako hauek berezita: zeharkako efektuak, metatze-efektuak, efektu sinergikoak, epe labur, ertain eta luzerako efektuak, efektu iraunkorrak eta behin-behineko efektuak.

Azterketaren 1.2.d atalean identifikatutako ekintza guzti-guztien ondoriozko ingurumen-ondorioak deskribatuko dira, atal horretan ekintzei esleitutako kodea berariaz aipatuta. Hala dagokionean, zenbait ekintzaren konbinaziotik eratorritako efektuak zehaztuko dira. Era berean, biztanleriaren, giza osasunaren edo ondasun materialen gainean ondorio kaltegarri eta nabarmenak izan ditzakeen edozein ingurumen-izaerako efektu bereiziko da.

Horrela deskribatutako planeko efektu bakoitzari kode bat esleituko zaio. Kode hori azterketaren hurrengo ataletan erabiliko da, eta atal horietan haren aipamena egin beharko da.

Beste alderdi batzuen artean, honako eragin hauen analisia jorratuko da:

- Ballonti ibaiaren ertzetan egindako jarduketengatik ibilgu horri loturiko fauna-espezieen habitatak nozitu ditzakeenak. Batik bat, arrain hiruarantzaren (*Gasterosteus aculeatus*) populazioak nozitu ditzakeen eraginak hartu beharko dira kontuan. Horrenbestez, Bizkaian arrain hiruarantza kudeatzeko plana aplikatu behar da (Bizkaiko Foru Aldundiak 186/2008 Foru Dekretu bidez onartua 2008ko abenduaren 9an). Halaber, bisoi europarraren habitatak nozitu dezakeen eragina aztertuko da Ballonti ibaian, espeziaren kudeaketa-plana kontuan hartuta (ekainaren 19ko 118/2006 Foru Dekretuaren bidez onartu zuen Bizkaiko Foru Aldundiak).
- Gainera, uholde-arriskuak hirigintza-garapenean izan dezakeen eragina aztertuko da, eta behar bezala justifikatu beharko da indarreko plan hidrologikoaren araudia betetzen dela, zaintza-eremu urpekorreko erabilera-mugei dagokienez (40. eta 41. artikulua). Justifikazio hori arloan eskumena duen organo baten azterketa hidraulikoan edo txostenetan oinarritzen bada, horiek ere aurkeztu beharko dira gainerako dokumentazioarekin batera, ingurumen-adierazpen estrategikoa eskatzeko.
- Kutsatuta egon daitezkeen kokagunetan egindako indusketen eta lur-mugimenduen ondoriozkoak.
- Ingurumen-azterketa estrategikoan aztertuko da aurreikusi diren erabileretan zer mailatan betetzen diren 213/2012 Dekretuan ezarritako kalitate akustikoaren helburuak (213/2012 Dekretua, urriaren 16koa, Euskal Autonomia Erkidegoko kutsadura akustikoari buruzkoa). Hala, zehaztu egin beharko da eremuan aplikatu beharreko araudiak aukera ematen eremuko ekoizpen-erabilera bereizgarriak dagozkion babes akustikoko betekizunak baino zorrotzagoak bete behar dituzten erabilerak kokatzeko. Horretarako, kontuan hartuko dira, eta, behar bada, berrikusi, irismen-



dokumentua eskatzeko aurkeztu zen dokumentazioan sartutako inpaktu akustikoaren azterketako emaitzak.

b. Identifikatu eta kodetutako efektuak baloratzeko, honako alderdi hauek hartuko dira kontuan, besteak beste:

- Gertatzeko zer probabilitate duten, zenbateko iraupena eta maiztasuna izan dezaketen, eta itzulgarriak ote diren.
- Efektuen larritasuna eta irismen espaziala.
- Eraginpean gera daitekeen eremuaren balioa eta zaugarritasuna, honako hauek kontuan hartuta:
- Ezaugarri natural, kultural eta paisajistiko bereziak egotea.
- Aurkako ingurumen-baldintzak egotea, airearen, uraren edo lurzorua kalitate-estandarrak edo muga-balioak gainditzeko moduan.
- Planak ingurumen-arriskuak zein heinetaraino sortu edo areagotu ditzakeen.

Ahal den guztietan, efektuak kuantifikatzeko, Planean aurreikusitako jarduketak eta proiektuak gauzatzearen ondorioz deskribatu diren ingurumen-faktoreen egoera-aldaketan datu neurgarriak erabiliko dira. Hala dagokionean, efektu horien aurreikuspenetan dagoen ziurgabetasun-maila zehaztuko da.

c. Halaber, ahal den neurrian, efektuak kartografia bidez lokalizatuko dira, eta, orobat, zehaztu egingo da plan edo programaren zer fasetan gerta litezkeen, aurreikuspenen arabera.

d. Hautemandako ekintza horrek Planeko determinazioak beste plan eta programa batzuetan sartzea eskatzen duen adieraziko da, eta kasu bakoitzean eragindako planifikazio tresna zehaztuko da.

e. Hala deskribatutako ingurumen-efektuak hierarkizatu egingo dira, horien garrantzi erlatiboa nabarmentzeaz gain.

6.4. Prebentzio-, zuzenketa- eta konpentsazio-neurriak

a. Apartatu horretan, azterketaren 3. apartatuan deskribatutako ingurumen-efektu kaltegarriak prebenitzeko, murrizteko eta, hala badagokio, konpentsatzeko aurreikusita dauden neurriak deskribatuko dira. Hartuko diren neurriek bermatu egin beharko dute ez dela ingurumen-efektu esanguratsurik sortuko, Planaren ekintzak garatzearen eta etorkizunean gauzatzearen ondorioz. Natura-baliabideak, natura- eta kultura-ondarea babestea, natura-arriskuak prebenitzea eta atzemandako ingurumen-arazoan aurrean hobetu eta egokitzea izango dute helburu.

b. Proposatutako neurriek koherenteak izan beharko dute aurreikusitako ingurumen-efektuekin. Neurriak deskribatu egingo dira, eta 3. atalean identifikatutako ondoren edo efektuekin –prebenitu, zuzendu edo konpentsatu nahi direnekin– lotuko dira. Zehazki, eta beste batzuen artean, honako neurri hauek zehaztuko dira:

- Ballonti ibaiaren jabari publiko hidraulikoa eta erriberak babesteko neurriak, Ballonti eta Galindo ibaien uren kalitate-murrizketa gutxitzera bideratutakoak, eta arrain hiruarantzaren eta bisoi europarraren habitatek eraginik ez izatera bideratutakoak. Interes berezikotzat hartu da Ballonti ibaiaren ertzak landareztatze proposamena, kontuan hartuta eremu hori «hobetu beharreko tarteak» motakoa dela, bisoi europarraren kudeaketa-planaren arabera (ekainaren 19ko 118/2006 Foru Dekretuaren bidez onartu zuen Bizkaiko Foru Aldundiak).
- Lurzorua kutsatzea saihestu eta kutsatutakoa garbitzeko eta lurzoru kutsatuak kudeatzeko neurriak.
- Uholde-arriskua prebenitzeko neurriak. Horiek zehazteko, ebazpen honen aurreko apartatuetan aipatu diren planetan ezarritako irizpideak hartuko dira kontuan: EAEko Ibaietako eta Erreketako Ertzak Antolatze Lurralde Plan Sektoriala (E.2 apartatua) eta Kantauri Ekialdeko Plan Hidrologikoa (2015-2021), bereziki atal arauemaileko 44. artikulutik 46. artikulura zehazten diren irizpideak, baita arloan eskumena duen organoak gai horren gainean emandako txostenak ere.

- Hala badagokio, kalitate akustikoaren helburuetara iristeko behar diren neurriak ezarriko dira, EAEko hots-kutsadurari buruzko urriaren 16ko 213/2012 Dekretuko 40. artikuluan zehaztutakoaren arabera, eta eremu akustikoak eta erabilera aurrekusiak kontuan hartuta.
 - Lurrazal handiak iragazgaiztearekin eratorritako jariatze-urak kontrolatzeko neurriak, eta proposatzen den antolamenduarekin eraldatuko diren gainazalak lehengoratzekoak. Horiek zehazteko, ebazpen honen aurreko apartatuetan aipatu diren planetan ezarritako irizpideak hartuko dira kontuan: EAEko Ibaietako eta Erreketako Ertzak Antolatze Lurralde Plan Sektoriala (E.2 apartatua) eta Kantauri Ekialdeko Plan Hidrologikoa (2015-2021), bereziki atal arauemaileko 44. artikulutik 46. artikulura zehazten diren irizpideak.
 - Ingurumen-ebaluazioari buruzko abenduaren 9ko 21/2013 Legeak eskatzen duenez, ingurumen-txosten estrategikoak hainbat neurri jasoko ditu, planak klima-aldaketan izan dezakeen eragina arintzeko eta hartara egokitzeko. Xede horrekin, IHOBek egindako gida metodologiko hauek erabili ahal izango dira erreferentzia gisa: «*Klima-aldaketara egokitzeko udal-programak egiteko gida. Udalsarea 21 lan-koadernoa*» eta «*Euskadiko Hirigintzaren Plangintzari buruzko eskuliburua klima-aldaketa arintzeko eta klima-aldaketara egokitzeka*».
- c. Proposatutako neurriak planaren zein zatitan txertatu diren adieraziko da, eta berariaz zehaztuko da neurri horiek planean bildutako zein dokumentu teknikotan jaso diren.
- d. Hala badagokio, prebentzio, zuzenketa eta konpentsaziorako neurriak proposatuko dira, plangintzaren geroagoko fase edo etapetan edo Plana gauzatzeko etorkizunean diseinatuko diren proiektuetan aplikatzea komenigarri edo egingarria denean.
- e. Kostu ekonomikoren bat dakarten prebentzio eta zuzenketarako neurrien aurrekontua ere jasoko da, horiek gainbegiratzeaz arduratuko den agentea edo pertsona adierazteaz gainera.

6.5. Ingurumena zaintzeko programa

- a. Azterketak ingurumena zaintzeko programa bat garatuko du, eta, bertan, Plana aplikatzeak dakartzan ondorioak berrikusteko aurreikusitako neurriak deskribatuko dira. Neurri horiek alderdi hauek kontrolatzeko jomuga izan beharko dute:
- Planak ingurumenean izan ditzakeen efektu kaltegarriak prebenitzeko, murrizteko edo zuzentzeko aurreikusita dauden neurriak behar bezala abiarazten direla gainbegiratzea.
 - Ingurumen-elementu garrantzitsuen bilakaera zaintzea, baita plana martxan jarri aurretik zeuden ingurumen-arazoen bilakaera ere.
 - Plana gauzatzearen ondoriozko ingurumen-efektuak egiaztatzea, aurreikusi gabeko efektu kaltegarriak azkar identifikatzeko eta horiek saihesteko edo zuzentzeko neurri egokiak hartu ahal izateko.
 - Prebentzio- eta zuzenketa-neurri osagarriak hartu behar ote diren hautematea, plana egikaritzeko aurreikusitako garapen-tresna eta proiektuetan.
- b. Jarraipen-neurriak azterketaren 4. apartatuan jasotako babes, zuzenketa eta konpentsaziorako neurriekin identifikatuko dira, eta horiekin bat etorri beharko dute.
- c. Ingurumena zaintzeko programak azterketan proposatzen diren adierazleak jaso beharko ditu, baita – kasu bakoitzean – datuak biltzeko erabiliko diren aldizkakotasunari eta metodoei buruzko proposamen zehatz bat ere.

6.6. Ingurumen-laburpena.



a. Apartatu honetan, ingurumen-alderdiak planean txertatzeko modua deskribatuko da. Xehetasunez aztertuko da nola hartu diren kontuan eta nola betearazi diren ingurumena babesteko ezarritako irizpideak, helburuak eta zehaztapenak, azterketaren 1.1 apartatuan deskribatutakoak.

b. Aztertu egingo da, gainera, planak etorkizunean ingurumenean eragin adierazgarriak izateko zenbaterainoko arriskua dagoen eta beharrezko argudioak emango dira, honako hau egiaztatze aldera: proposatutako babes, zuzenketa eta konpentsaziorako neurriak planean txertatuz gero oso arrisku txikia dagoela efektu esanguratsu horiek jazotzeko eta, ondorioz, ez dagoela eragozpenik plana garatzeko. Ondorio hori laburbiltzeko, azterketaren gainerako ataletan jasotako informazioei buruzko erreferentzia egokiak erabiliko dira.

6.7. Laburpen ez-teknikoa.

a. Azterketak emandako informazioaren laburpen ez-tekniko bat ere bilduko du, eta ebaluazio-prozesuan jorratutako gaietako prestakuntza espezifikorik ez duten pertsonak erraz ulertzeko moduan idatzita egon beharko du laburpen horrek.

b. Apartatu honi, gainera, egindako ebaluazioa hobeki ulertzen lagunduko duen informazio grafikoa ere erantsi beharko zaio edo, bestela, informazio hori erraz eskuratzeko behar diren erreferentziak jaso beharko dira.

7. Jendaurreko informaziorako eta kontsultetarako izapideak.

Urriaren 16ko 211/2012 Dekretuaren 12. artikuluan eta abenduaren 9ko 21/2013 Legearen 21. artikuluan ezarritakoaren ondorioetarako, organo sustatzaileak jendaurreko informazioaren izapidearen eraginpean jarriko du plan honen hasierako bertsioa, ingurumen-azterketa estrategikoarekin batera, gutxienez, 45 egunez.

Era berean, aintzat izanda zer xedatzen den ukitutako administrazio publikoei eta interesdunei egin beharreko kontsultei buruz bai urriaren 16ko 211/2012 Dekretuaren 12. artikuluan bai abenduaren 9ko 21/2013 Legearen 22. artikuluan, erakunde eta pertsona interesdunen zerrenda hau hartuko da kontuan:

- Eusko Jaurlaritzako Natura Ondare eta Klima Aldaketa Zuzendaritza.
- Eusko Jaurlaritzako Kultura Ondarearen Zuzendaritza.
- Eusko Jaurlaritzako Bizkaiko Osasun Publikoaren eta Adikzioen Zuzendariordetza.
- URA. Uraren Euskal Agentzia.
- Ihobe. Eusko Jaurlaritzako sozietate publikoa.
- Bizkaiko Foru Aldundiko Ingurumeneko Zuzendaritza Nagusia.
- Bizkaiko Foru Aldundiko Kultura Zuzendaritza Nagusia.
- Bizkaiko Foru Aldundiko Azpiegituretarako eta Lurralde Garapenerako Zuzendaritza Nagusiaren Ingurumenaren Iraunkortasunerako Atala
- Eguzkizaleak Aisialdirako Elkartea.
- Ekologistak Martxan Bizkaia Elkartea.
- Industri Ondare eta Herri Laneko Euskal Elkartea.

8. Dokumentazioa aurkezteko jarraibideak.

2013ko abenduaren 9ko 21/2013 Legearen 16. artikulua arabera, kualifikazio profesionala eta goi-mailako hezkuntzari buruzko arauen arabera behar besteko gaitasun teknikoa duten pertsonak egin beharko dute Azterketa, eta Legearen eskakizunak betetzeko behar den kalitatea izango du. Azterlanaren egileak identifikatu egin beharko dira, haien titulazioa eta, hala badagokie, lanbide arautua adierazita. Identifikazioak barne hartu beharko ditu izena, abizenak eta nortasun-agiri nazionalaren edo helburu bererako beste edozein agiriren kodea (elkargokide-zenbakia entregatuz gero, horrek bat etorri behar du elkargo profesional jakin baten erregistroarekin). Gainera, amaiera-data eta pertsona horien sinadura jasoko dira. Azterketaren



edukien eta informazioaren fidagarritasunaren erantzule izango dira horiek, salbu eta Administrazioak berak frogagarri gisa emandako datuak.

Dokumentazioa aurkezteko, jarraibide hauek bete beharko dira:

1. Ingurumen-adierazpen estrategikoaren eskaerarekin batera aurkeztutako dokumentuek behar den koherentzia errespetatu beharko dute, bai haien artean bai aurretik aurkeztutakoekin, halakorik bada; hartara, ez da oztopatuko erabakia hartu behar duten administrazio-organoen lana, baizik eta erraztu egingo da.
2. Arreta berezia jarri beharko da kasu bakoitzean dokumentu teknikoaren atalak haien artean erlazionatzea ahalbidetzen duten datuak adieraztean (esaterako, atal batean planeko ekintzak deskribatzen badira eta beste batean ekintza horiek eragindako ingurumen-inpaktuak, bi kasuetan, izen berarekin aipatu beharko dira ekintzak).
3. Beharrezkoa bada, datuak zein iturritatik lortu diren adierazi behar da.
4. Planaren, programaren edo proiektuaren dokumentazio grafikoa eta kartografikoa sartu behar da hala eskatzen duten apartatueta. Planoak pdf formatuan entregatu beharko dira, georreferentziatuta.
5. Analisi tekniko egokia errazteko, bistaratzeko pdf formatuko artxiboez gain, planoen kopia gehigarri bat entregatu beharko da *shape* formatuan (ahal dela, UTM30N ETRS89 erreferentzia-sistema erabilia), 10 Mb-koa baino gutxiagokoa izan beharko duena. Shape fitxategi horretan, 4 fitxategi hauek ZIP fitxategi batean entregatuko dira konprimatuta: .shp, .shx, dbf, .prj.

Lau fitxategiak bilduko dituen «eremua.zip» shape konprimatuaren adibidea:

- eremua_adibidea.shp
- eremua_adibidea.shx
- eremua_adibidea.dbf
- eremua_adibidea.prj

6. Plano guztiak kodearekin eta tituluarekin identifikatu behar dira. Halaber, honako hauek adierazi beharko dira: irudikatutako datuak zuzen interpretatzeko behar diren azalpenak eta sinboloak; eskala grafikoa eta zenbakizkoa, inprimatzeko formatua adierazita; sinadura eta noiz egin den.
7. Jatorrizko eskalatik murriztutako planoak aurkeztuz gero, zuzendu egin beharko da planoan jatorrian adierazitako eskala, aurkeztutako planoan oinarritutako neurketek ez dezaten akatsik izan.
8. Testuetan zehar aipaturiko eranskin, irudi, plano edo argazki guztiak dokumentazioarekin batera aurkeztuko dira. Erreferentzia horiek kasuan kasuko elementua erraz aurkitzeko moduan egingo dira, argi eta garbi.
9. Informazio jakin bat dokumentuko apartaturen baten zuzenketa gisa aurkeztekotan, eta aldi berean espedientean zuzendu nahi den apartatua mantentzen bada, informazio berriak adierazi beharko ditu zuzenketaren ondorioz jatorrizko dokumentuan ezeztatutak edo ordezkaturak jo beharreko kapituluak, orrialdeak, epigrafeak, apartatuak, lerroak, esaldiak, koadroak, irudiak, planoak eta abar. Aurreko informazioaren bat osatzen edo zuzentzen duen informazioak egoera horren berri eman beharko du hasieran. Eskaera bat zuzentzeko aipaturako jarraibideak betetzen ez badira, izapide gehigarri bat eskatu ahal izango da, kontraesaneko edo inkongruenteak izan daitezkeen alderdiak argitzeko, eta horrek atzerapena eragin dezake prozeduraren ebazpenean.
10. Eskaera IKS-*eem* sistemaren bidez aurkeztu beharko da, aplikatzekoak diren fitxak eta formularioak erabilia, zeinak Ingurumen, Lurralde Plangintza eta Etxebizitza Sailaren webgunean eskura daitezkeen, helbide honetan zehazki: <http://www.euskadi.eus/informazioa/ingurumenari-buruzko-izapide-elektronikoen-gida/web01-a2inguru/eu/>
11. Dokumentu bat .pdf formatuan aurkeztu denean, gehienez 30 MB izango ditu eta bilaketak egitea ahalbidetu beharko du. Dokumentu handiagoak zatitu egin beharko dira, sisteman sartuko badira.
12. Aurkeztutako dokumentazio guztiaren aurkibidea txertatuko da, adierazitako ataletako bakoitza zer orrialdetan dagoen zehazteko. Aurkibidea aurkeztean .pdf dokumentu baterako, adierazitako orrialde-



zenbakia bat etorriko da orrialde hori aurkitzeko irakurketa-programaren «Joan orrialde honetara» aginduan adierazi behar denarekin.

13. Organo sustatzaileak, datuak igortzean, datu pertsonalak babesteari buruzko araudia betetzen duela bermatu beharko du beti.

Bigarrena. Ebazpen hau Sestaoko eta Trapagarango udalei komunikatzea.

Hirugarrena. Ebazpen hau Ingurumen, Lurralde Plangintza eta Etxebizitza Sailaren webgunean argitaratzeko agintzea.

Vitoria-Gasteiz, 2019ko abenduaren 11

Ingurumen Administrazioaren zuzendaria
Director de Administración Ambiental

